

ep
gr.

2613

153

3313

DISCOVRS
SVR LA
RECEPTION
du Concile de Trente
en France.

15

1615.

1615
30/12

THE

LIBRARY

OF THE

CONGRESS

1812

*Discours sur la reception du Concile de
Trente en France.*

ON a veu ces jours passez liberallement distribuer par vn des Euesques, deputez du Clergé, vn libelle portant le tiltre de Responce aux Obiections qui se font pour empescher la reception du Concile de Trente. L'on croioit que ce pourroit estre l'ouurage de quelqu'un d'entr'eux, qui eust employé là son grand loisir, pour apporter des raisons couuertes de quelques belles apparences, avec vn stile, sinon naif & elegant, à tout le moins tolerable: au contraire à l'ouuerture du liure, l'on y remarque vn stile esgaré, affecté & impropre, qui porte avec luy le nom de son Autheur trop cogneu parmy nous, qui par des façons de parler barbares ne s'est encores peu faire admirer que par les femmes & les ignorans. Mais ce qui est detestable, est qu'il s'est malicieusement feint des obiections, pour la plus part ineptes, ridicules, & impertinentes, pour y respondre avec aduantage. C'est ainsi qu'il luy a fallu faire pour tromper les plus simples: & par là l'on void le peu d'estime qu'il faiét, & du Clergé, & de la Noblesse Françoisé, puis qu'il s'est ima-

giné les pouuoir si facilement abuser. Des l'entree de sa preface, cet homme lamente la miserable condition de la France, de n'auoir receu le Concile, & que toutes les miseres qui se peuuent imaginer, comme factions, seditions, guerres ciuiles, pestilences, inondations de riuieres, mortalité de bestiaux, & maladies inconnues, nous sont arriueez par ce seul defect ; comme si l'Italie ou l'Hespagne, ou le Concile est obserué, ou pour le moins le doit estre, estoient exemptes de toutes ces miseres & fleaux de Dieu ; comme si Rome ne se resentoit des inondations du Tibre fort frequentes, & le reste d'Italie de toutes ses autres riuieres ; bref comme si aux pays ou le Concile est receu, les bestiaux estoient immortels . & comme si auant le Concile, la France n'auoit eu ces incommoditez . Ce sont considerations ridicules . Il fait d'auantage, il raporte à ce defect la mort de cinq de nos Rois, dont deux ont esté miserablement assassinéz . Ce sont considerations dignes de luy . Et est vne chose estrange qu'il faut que pour cela nos Roys, Rois tres-Chrestiens & Catholiques, nous soient ravis ; que luy mesme en la suite de son discours impose que le grand Henry disoit souuent,

Qu'il mourroit content, si une fois le Concile estoit receu en son Royaume. Ce qui est faux & contraire à tant d'actes publics qui demeurent à la posterité pour faire voir que ce grand Prince n'eust jamais en l'esprit ceste publication. Ce cauillateur faiët paroistre en la suite de son discours de quel esprit il est poussé par ces mots scditieux, de faux freres, schismatiques, de Caton Anglois, Serment d'Angleterre: & puis de dire, qu'il y en a qui veulent commettre les Princes du sang contre les autres Princes, les Cours de Parlements de France contre le Parlement de Paris: bref de vouloir faire croire que les vrais François veulent abaisser la Maiesté Royale au deffous des Estats. Il suit en cela les erres de nos miserables passées, que ceux qui sont de son aduis & de sa robbe ont fomentées, imposant impudemment à ceux qui ne craignent rien tant que de luy ressembler, qu'ils improuvent toute la cōstitution de cct Estat, les deportemens des grands: & tout cela pour auoir parlé veritablement & franchement de certaines gens qui sont à scandale à la France. Pour eluder donc toutes les fortes oppositions qui se peuuent faire contre le Concile, il les ramasse en peu, comme par mespris: & dit premierement; Que l'on faiët croire aux Rois

qu'il y va de leurs droits & de la preſeance de leurs Ambaſſadeurs. Ce qui n'eſt de petite conſideration : Car il eſt tres-certain, que l'on a mis en doute le droit qu'à le Roy de preceder tous les Rois Chreſtiens, en vn lieu, ou on n'a deub rien faire que de ſainct, & conſeruer les Princes aux droits qui leur apartenoient. Peut-on ignorer ſans malice, avec quel honneur la premiere Bulle d'indiction du Concile faiète par le Pape Paul III. parle de noſtre Roy lors regnant, le nommant ſeul avec l'Empereur : ce que depuis il ne fut pas poſſible de tirer des autres Papes ſes Succeſſeurs. Ne void on pas le tort faiète au Roy en donnant ſiege hors rang à l'Ambaſſadeur d'Heſpagne, qui deuoit ſeoir apres celuy du Roy, comme celuy du Roy apres celuy de l'Empereur ? Les Proteſtations de Meſſieurs du Ferrier & Pi-brac Ambaſſadeurs du Roy ſont publiques, lors qu'ils ſe retirerent à Veniſe du conſentement du Roy Charles IX. Etpuis avec quel front peut on dire que le Roy ni a point eu de deſaduantage ? Il y a encores deux autres points que l'on n'a pas oſé dire, pour eſtre ſans reſponce : & toute la Sophiſterie ni peut rien. Le premier fut à la celebration de la Meſſe, lors qu'il

fut question de donner l'encens aux Ambassadeurs, & de leur donner à baiser la paix, l'un apres l'autre. Par droict les Ambassadeurs du Roy deuoient auoir & l'un & l'autre de ces honneurs immediatement apres l'Ambassadeur de l'Empereur, & sans concurrence avec aucun autre. Il fut iugé toutesfois au contraire: & ordonnerent qu'il y auroit deux encensoirs & deux platines: & qu'en mesme temps l'Ambassadeur du Roy & celuy du Roy d'Espagne auroient cet honneur, qui est en effect nous affoiblir ceste prerogative, par vne accommodation tres-desaduantageuse. L'autre point, qui n'est pas sceu de tous, interuint à la session où l'on traita du mariage: il fut question d'en communiquer aux Docteurs de toutes les Nations pour en auoir leur aduis; leur debat fut qui parleroit le premier; les François croioient le deuoir faire estās enuoyez par leur Roy, le premier Roy du monde; Et aussi que d'ancienneté la nation Gallicane, comme premiere Chrestienne, opine premiere aux Conciles que l'Espagnolle, comme il fut obserué au Concile de Constance: au contraire les Ministres du Roy d'Espagne vindrent iusques aux menaces, si hardies, que le Car-

dinal Seripandi, Legat au Cōcile, leur en fit vne seuerere reprimende, leur disant qu'il n'estoit pas possible que leur maistre leur eust dōné telle charge. Voicy les termes de la lettre de ce Cardinal Legat escrite de Trente le 13. Feurier c10. 15LXIII. au Cardinal Amulio qui estoit à Rome, *Chil Re Cattolico* (ce sont les menaces des Hespagnols) *vindicarebbe questa ingiuria con l'armi, & che lascierebbe la protettione & riuerenzia della chiesa, & che per questo che si facera da noi, si trasferirebbe la sede Apostolica in Spagna.* Ces menaces eurent tel effect, que les Docteurs opinerent selon le temps de leur promotion, & ne faut pas s'arrester à leur qualité, qui semble de peu de consideration: car ils ont les mesmes pretentions contre tous les ordres de ce Royaume, contre le Clergé, contre la Noblesse, & contre les Magistrats. Le desaduantage donc que le Roy a eu en cecy, c'est ceste egalité, qui n'auoit iamais esté en autre Concile, ceux de Constance, de Basle, & de Latran auoient conserué au Roy son droit. Pour sortir de ce mauuais pas, l'on diât que ce n'estoit matiere de Concile, & que le Pape Pie III. repara tout à Rome l'an c10. 15LXIII. ordonnant que Monsieur d'Oisel Ambassadeur du Roy auroit le

le premier rang contre la viue poursuite de celuy d'Espagne. Ces solutions sont foibles: car l'on sçait que ce n'est qu'en suite du Concile que le Roy d'Espagne a pretendu principalement ce droit; que depuis ce temps nos Rois n'ont plus d'Ambassadeurs vers l'Empereur, & autres Cours, ou la maison d'Austriche domine; que depuis le Concile sont sortis au iour quantité de gros volumes de la part des Hespagnols, pleins d'inepties, donnans cause gaignee à leurs Rois. Que si l'on dit que ce n'est matiere de Concile, l'on l'accorde volontiers: il ne deuoit donc rien ordonner de nouueau aprestant d'exemples si clairs & sans difficulté. Et si le Concile n'en a peu cognoistre, pourquoy le Pape l'a t'il peu? Et encores l'histoire porte qu'il eust bien de la peine à se resoudre à nostre aduantage. Et c'est certes vne miserable raison, qui ne doit estre de mise parmi nous, si nous tenons les maximes de nos Peres, que le Pape remit au Roy ce qui luy auoit esté osté, comme s'il pouuoit quelque chose par dessus le Concile, & comme si ce qui est fait à la face de route la Chrestienté en plein Concile, estoit suffisamment reestabli dans vne ville, dans vne chambre, & en presence de peu

de personnes. L'auteur de ceste Preface, adiouste que l'on faiet croire au Roy que son droit de nomination, & les droits de patronages sont diminuez, les exemptions des Chapitres du tout abolies, & puis vient aux duels, aux indults, & à l'Inquisition. Pour la Nomination du Roy, elle y est visiblement diminuee lors que le Concile donne au sainct Pere la puissance de pourueoir aux Eueschez, au lieu des Euesques, non residets. Cecy est de grande consequence, veule peu de deuoir que plusieurs de nos Prelats font de resider en leurs Dioceses. Et parle le Concile absolument en celieu, taisant les concordats & conuentions qui sont entre le S. Siege & ceste Couronne. Les Euesques sont Iuges des droits de Patronage, sans distinction: & les explications que l'on veut donner à ces deux points, sont autant de procez qui naistront sur l'interpretation de ces articles apres la publication du Concile. Pour les exemptions des Chapitres, c'est à eux à s'en deffendre: l'opposition qu'ils firent en l'annee MD. LXXVI. aux Estats tenus à Blois, parle suffisamment pour eux: ils n'auront moins de courage que leurs predecesseurs. Qui faiet doute que les Indults oëtroyez au

*Sess. VI.
cap. I. fi.*

*Sess. 25.
c. IX.*

*Sess. VI.
c. 4.*

Parlement de Paris, soient spécialement abolis en la sess. 24. c. 19. toutesfois deux depuis peu ont esté si hardis que d'escrire qu'il n'en estoit parlé en aucune façon dans le Concile ? quelle effronterie ? Pour l'Inquisition, bien qu'elle ne soit exprimée dans le Concile, elle vient nécessairement en suite de la publication. Car il est certain que le nerf de la Loy c'est la peine, qu'une Loy sans peine est vn corps sans ame. Les peines corporelles sont arrestées, & s'exécutent tous les iours contre ceux qui ont des opinions contraires aux décisions du Concile, aux lieux où il est receu. Or ces decretz, & les peines qui viennent en consequence seroient du tout inutiles, s'il ni auoit vn moyen pour y paruenir, & vne exacte recherche contre les cōtreuenans. Ceste recherche est ce qu'on appelle Inquisition, la plus dangereuse & detestable inuention qui fut iamais, selon que l'on en vse à present, pour opprimer l'innocent, & ouvrir la porte à la calomnie & à la barbarie. Les exemples sont ordinaires aux pays où ce mal s'est glissé, & où nous courons la teste baissée. Ceux qui ont escrit pour la deffense du Concile, depuis l'ouuerture des Estats, & particulièrement nostre

cauillateur (qui s'est feint des monstres, auxquels l'on ne veut respondre, pour n'estre agité de mesme esprit que luy) se sont bien gardez de toucher le point de la puissance du Concile par dessus le Pape: ce qui a passé en France de tout temps en faueur du Concile; les Conciles de Constance & de Basle l'ont ainsi décidé: la Sorbonne les a suiuis, voire precedez: le Concile de Trente n'a rien fait de pareil, au contraire, l'on en tire des consequences du tout necessaires pour le Pape; car il suspend & transfere le Concile, contre l'expresse constitution de celuy de Constance, & contre ce qui s'est obserué de tout temps. Il n'ose pas prohiber au Pape de ne plus faire des commandes, mais s'assure qu'à l'aduenir il en vsera modere-ment. L'on luy demande la confirmations des Canons du Concile, qu'il peut infirmer, si bon luy semble; qui est contre ceste maxime ordinaire, que le Concile à la puissance immediatement de Dieu, & que le Pape ne luy peut resister; c'est la doctrine des Conciles precedens, & de toute la France. Il y a aussi en plusieurs lieux du Concile, sauf en toutes choses l'autorité du saint Siege; d'où resulte que quelque bon & saint Decret qui puisse estre, il

peut estre affoibli, voire aneanti, sil plaist au Pape, par le moyen des dispenses qu'il a pouuoir de donner: ce que nous voions estre pratiqué extraordinairement en vn Article tres-important, souuent reiteré au Concile, touchant la pluralité des benefices en vne mesme personne, article approuué il y a long temps en France, bien que non obserué. Toutesfois le Pape en dispense tous les iours aux lieux mesmes ou le Concile a esté publié. Les appellations comme d'abus, le seul remede qui soit en France pour contenir la Cour de Rome & les Ecclesiastiques François en leur deuoir, seront non seulement affoiblies, mais du tout abolies: c'est vn moyen toutesfois fort vtile & temperé pour les empescher de ne rien entreprendre au prejudice des Canons & Saincts Decrets, des droits du Roy, & libertez de l'Eglise Gallicane, & Arrests des Cours Souueraines de France. Tellement que si le Concile est receu, nous serons sans deffence; nous condamnerons d'erreur nos Peres; les Arrests de tous les Parlements, & Decrets de la Sorbonne, ne nous seront plus rien; bref nous seront en horreur, bien qu'ils ayent esté sainctement & vtilement resolu & publiez. Ce seroit vn labour infiny

de vouloir coter par le menu les Articles qui se trouuent contraires à l'autorité du Roy, & des Ecclesiastiques, & particulièrement des Euesques, qui n'aurent plus de pouuoir ordinaire, mais delegué. Les Magistrats & toutes sortes de Iuges recognoistront en l'exercice de leurs charges vne grande diminution de leur auctorité, & les suieets du Roy se verront insensiblement assuietis à la iustice Ecclesiastique, par le moyen de l'observation du ch. i. de *Clericis cõiugat. in 6.* qui est de Boniface VIII. Bref, le Roy, les Grands, & les nobles, priuez de leurs fondations & patronages, & mesmes de leurs fiefs, en obseruant le chap. des duels qui excommunie, premierement ceux qui auront permis vn duel, & confisque les fiefs ou les duels auront esté faicts au profit des Seigneurs dont ils releuent; en quoy le Roy particulièrement à grand interest, puis qu'il est Seigneur de certaines villes en Flandres qui releuent du Roy d'Espagne. Ce n'est pas que l'article contre les duels ne soit tres-sainct. Nos Rois ont fait toutes sortes d'Ordonnances tres-seueres, pour pourueoir à ce mal, dont la France est plus infectée, qu'aucun autre pays. C'est d'eux que leurs suieets doiuent attendre la puni-

S. ff. 25.

c. xix.

tion, s'il y contreuiennent; mais ce faulx & malheureux point d'honneur est si fort empreint dans les ames de la noblesse Françoise, qu'il ni a perte de la vie, des biens, & l'infamie apres la mort, & l'euident hazard de l'ame, qui ypuissent mettre remede. Il y a vn autre Article dans le Concile, qui n'est pas de petite cōsequen-
ce, touchant la reception de toutes les constitutions des Papes, en general, faictes en faueur des Ecclesiastiques: car soubz cela sont comprises les Decretales, le Sexte qui est de Boniface VIII. ennemy iuré de ceste Couronne; bref, tout ce qui est iamais sorti de l'inuention des Papes en faueur des Ecclesiastiques, qu'ils rendent & declarent exempts de toutes charges pour en surcharger les autres ordres: c'est à quoy le Tiers-Estat doit prendre garde; tout le mal de cet article le regarde. Si l'on vouloit s'estēdre plus auant, l'on montreroit plusieurs defaux aux indictiones & translations du Concile, & en sa conclusion, ou les Ambassadeurs du Roy ne furent point, & leur absence autorisee par leur Maistre, par ses lettres du 19. Nouembre 1563. Conclusion qui n'a esté faicte par le Concile, mais par le Pape seul, qui est contre ce qui s'estoit obserué

*Sess. 21.
c. xx.*

auparavant. L'on remarqueroit aussi, que si l'on s'est plaint de tout temps de grâdes & immenses sommes d'argent, qui sortent tous les ans de ce Royaume, pour estre portees à Rome, que Messieurs du Parlement de Paris en leurs remonstrances au Roy Louis XI. ont remarqué monter par fois plus de deux millions huit cens mille escus par an, que ne dira t'on point apres la publication du Concile, lors que les suieets du Roy de toutes qualitez seront obligez de se pourueoir à Rome pour vn nombre excessif de dispenses, contre infinies articles de reformation; & de cela il n'en faut esperer aucune gratification; ce qui augmentera de beaucoup le reuenu du Pape, ou de sa Cour, & appauurira d'autant ce Royaume. Contre ces considerations, qui sont communes, & qui se presentent à l'ouuerture du Concile, l'on sçait toutesfois que Messieurs du Clergé ont arresté dans leur Cahier general de supplier le Roy d'en faire faire la publication en son Royaume. Et sçait on plus, ce qui estonne la France, qu'il y a eu de grandes contestations sur les modifications, que ceux qui estoient immediatemēt auant eux ont recogneuës necessaires pour paruenir à leur dessein, & qu'au-

qu'aucuns d'eux depuis peu d'annees ont employé en quelques Actes. Par là ils font paroistre qu'il ont peu de soin de l'autorité Royale, & qu'ils n'ont pour but, ce semble, que l'auancement particulier de leur auctorité. Mais l'esperance qu'ont ceux qui ne regardent qu'à la grandeur du Royaume, est qu'ils en seront aussi genereusement refusez, comme ils ont esté le temps passé. Et se remarque que ceste demande a esté plus viuement poursuiue aux temps du bas aage de nos Rois, & en des saisons pleines de craintes & de soupçons, & ou la tranquillité publique sembloit estre menacée de troubles. En l'annee cio. ic LXIII. en Feurier le Roy Charles IX. estant à Fontainebleau, les Ambassadeurs du Pape, du Roy d'Espagne, & du Duc de Sauoye, se ioignirent ensemble, pour le supplier de vouloir publier le Concile en son Royaume, & l'aduertir du iour assigné à Nancy, ou les Princes Chrestiens se deuoient trouuer à la lecture des Decrets du Concile, pour puis apres en iurer l'observation. Ces prieres n'eurent aucun effect en l'esprit du Roy, la qualité des personnes qui le pressoient avec tant d'instance, fut seule capable pour luy faire croire que ceste publi-

cation estoit contraire à son autorité, & à la grandeur de son Estat, & de son Eglise Gallicane. Ils creurent à Rome qu'après le 24. d'Aoust, de l'an cio. ic LXXII. durant ces horribles confusions, qu'il y auroit quelque apparence de l'obtenir. Le Card. Ursin vint en France pour cet effect de la part du Pape, & fit ce qu'il peut pour executer le commandement de son Maître. Ils en furent toutesfois genereusement rebutez par ceux mesmes qui condamnerent par le fer & les flammes la doctrine des heretiques, qui iugerent bien que la poursuite qu'on en faisoit n'estoit point pour les dogmes, mais pour changer la face de cet Estat. Aux Estats tenus à Blois en l'an LXXVI. les deputez des Chapitres s'opposerent à cette demande: les nobles & le Tiers-Estat se ioignirent avec eux, pour diuers interets. En vne assemblée generale sous le Roy Henry III. l'on remarqua LXXII. articles portans preiudice à l'autorité Royale, & aux libertez de l'Eglise Gallicane. Il est superflu de remarquer combien d'oppositions ont esté faictes par toutes sortes d'ordres à ce Cōcile. Il semble toutesfois à propos d'en remarquer vne notable advenue du regne du Roy Charles IX. dont

Monsieur le Procureur general Bourdin fut auteur , personnage de vie & de mœurs irréprehenfibles , par la confession mefme des Ecclefiastiques, lequel foppo- fa genereufement à Monsieur le Cardinal de Lorraine , apportant les Decrets du Concile pour les publier , & fut fuiui en ce genereux deffein de Messieurs les Presi- dens du Parlement, qui mandez à Fontai- nebleau , declarerent qu'ils remettroient pluftoft leurs offices entre les mains du Roy, que de consentir la publication du Concile, si preiudiciable à son autorité, & aux libertez & franchises de son Eglise. Les viues & violentes pourfuites faites en l'annee cio. io LXXIX, par les Euesques de Bazas & ſainct Brieu de la part du Clergé de France, n'eurent non plus d'ef- fect enuers le Roy Henry III. Prince pieux & tres-Catholique. Ce qui doit rendre confus les Autheurs de ceste de- mande, est, qu'au plus fort de la ligue, en ceste miserable afſemblee de pretendus Eſtats conuoquez à la ruine de la France, & à la ſubuerſion de ſes loix fondamenta- les, en la preſence d'un Legat du Pape, & d'un Ambaſſadeur du Roy d'Eſpagne, af- ſiſtez des plus denaturez François, ce peu qui reſtoit de gens de bien dans Paris, leur

faisant voir vn petit nombre d'articles visiblement contraires à la grandeur de cet Estat, & de l'Eglise Gallicane, eurent tel effect sur ces rebelles, qui ne recognoissoient pas mesme vn Roy, qu'ils surseirent toutes deliberations, & n'en parlerent iamais plus. A present que la France est en paix, que nous viuons sous vn mesme Roy, ces articles, qui ont arresté ces seditieux, ne nous font plus rien, l'on se contente d'y respondre par cauillations, & pense t'on auoir beaucoup fait. C'est ainsi qu'il faut tromper les plus faciles. Messieurs du Clergé n'ont pas donc ce semble assez consideré les consequences & inconueniens qui peuuent suiure ceste publication. La puissance Royale sans doute en sera diminuee, l'Estat esbranlé & du tout assuiety à la puissance Temporelle du Pape: car pour la spirituelle, ny a Royaume au monde ou elle soit mieux recogneuë qu'en France, & ne faut point dire, que c'est resister aux dictations du S. Esprit (c'est le mot dont ils vsent) ce sont parolles d'apparence, & rien d'auantage. Car l'on est d'accord avec eux que la doctrine contenuë dans le Concile que nous suiuous estreitement, a esté dictée par le saint Esprit, bien qu'elle fut aupara-

uant aussi claire , & expliquee ailleurs dans les liures & Conciles anciens , qui nous estoient communs , auant qu'on parlast iamais du Concile de Trente. Mais de vouloir dire que les articles de reformation & autres qui ne touchēt aux dogmes , sont dictations du saint Esprit , de mesme poids que les premieres , l'on ne le peut avec verité , veu que tous les iours le Pape & les Euesques mesmes en dispensent , & possible avec trop de liberté. C'est en ces articles de reformation ou nous recognoissons que nostre mal est caché , & non pas aux autres que nous reuerons & suiuios exactement , & en conscience. Pour dresser ces articles de reformation , on sçait les brigues & mauuais artifices dont on a vsé. Aquoy seruoient tant d'Euesques d'Italie & d'Espagne , qui estoient en nombre trois fois autant que les autres , sinon pour faire passer à la pluralité des voix ce que Rome & Espagne auoient proietté pour establir leur monarchie vniuerselle? Cecy a esté remarqué par les Ambassadeurs du Roy au Concile , personnages clairs-voyans , s'il y en eust iamais : & l'un d'eux ne pouuant plus supporter la seruitude de ceste assemblée , qui n'osoit rien resoudre sans l'aduis du Pape , escriuit

franchement au Roy qu'il ne deuoit rien esperer du Concile, que les suffrages n'y estoient libres, & que le saint Esprit venoit de Rome dans vne malette. La lettre se voit entiere dans les memoires & lettres escrites par les Ambassadeurs qui ont esté publiques pour instruire la posterité, comment on a procedé en ce lieu pour reformer l'Eglise. Ils passerent encores plus auant, recherchant les moyens de corrompre la fidelité des ministres du Roy qu'ils recognoissoient tres genereux. Voicy les termes de la Lettre du Cardinal Amulio, au Cardinal Seripandi Legat du Pape au Concile, escrite de Rome le 10. Mars CIO. IOLXIII. *Intendo ch'il presidente Ferriero governa tutti gli altri & io vorrei sapere se cosi e, & se à V. S. illustrissima paresse che fosse bene à guadagnarlo, & in qualche modo cio si potesse fare, & ben vero che egli, per quanto ho veduto da alcune sue lettere, dà à se stesso una grande autorità.* Il n'y a point de doute que l'on dira incontinent que l'on y apportera telles modifications, que les droicts du Roy seront conseruez, les libertez de l'Eglise Gallicane demeureront entieres, & les Chapitres en leurs exemptions. Ceste response faiet de l'effect en l'esprit de quelques vns qui ne considerent pas l'im-

portance du suiet, & que ces modifications se peuuent dire nulles & inutiles. Car de separer & diuiser ce qui a esté faict en vn Concile general, cela ne se peut faire qu'en vn autre Concile, & ne peut le Pape en dispenser si le Concile ne luy en donne la puissance: & quand il le pourroit faire, ce seroit vne concession nouuelle qu'il feroit au Roy, qui pourroit estre par son successeur aussi facilement reuocquee, comme elle aura esté accordee: *Concordia enim non ligant successores*, dit le Concile. Sess. 6.
Tellement qu'au lieu des libertez & franchises que nous auons de tout temps, & des droicts qui appartiennent au Roy, que l'Eglise ne luy peut oster, nous aurons des Priuileges reuocables. c. 4. ref. Ce seroit d'ailleurs accorder que le Pape est par dessus le Concile, qu'il le peut restreindre & limiter comme bon luy semble, contre nostre maxime ancienne; & aneantir plustost du tout ces beaux droicts anciens & communs, que nous auons conseruez avec tant d'honneur, durant tant de siecles, & que nos Rois iurent à leur Sacre de garder, il y a plus de cinq cents ans. Le Roy Henry le Grand, les actions duquel sont autant d'oracles pour ceux qui viendront après luy, sur la derniere demande qui luy

en fut faicte en l'annee 610. 1561. par les Ecclesiastiques, en ceste memorable assemblée du Clergé, leur fit vne responce qui merite d'estre inseree icy mot à mot: voicy ce qu'elle porte; *Qu'il ne pouuoit passer outre à la publication du Concile, pour les mesmes raisons & considerations qui ont retenu ses Predecesseurs, lesquels ont à la requeste du Clergé faict inserer dans les Ordonnances la pluspart de ce qui est dans les articles du Concile, & outre ce qu'il auoit faict cōferer par ses Ambassadeurs avec le feu Pape Clement VIII. sa Sainteté seroit demeuree contente de son zele & affection, & auoit pris en bõne part ce qu'il luy auroit fait représenter.* Quelle impudence donc apres cela, de faire dire à ce grand Prince, qu'il mouroit content, si ceste publication estoit faicte en son Royaume, luy qui n'a iamais rien entrepris que de grand, & qu'il n'ait faict réüssir selõ ce qu'il auoit desiré, tãt il auoit establi son Empire absolu sur ces suiets: bien loing qu'il peüst estre empesché de la volonté qu'il eust peu auoir de faire receuoir le Concile, sil en eust eu la moindre du monde. La clause, sans preiudice des libertez de l'Eglise Gallicane, seroit à propos, sil n'y auoit que quatre ou cinq Articles contraires aux decisions du Concile: mais ils sont en grand nombre, & si importants,

portans, que fils estoient representez au Pape, il ne voudroit iamais ouir parler de publication. L'on commenceroit par ceste maxime, que le Concile est pardeffus le Pape; ce qui ne reçoit doute parmi nous, & mesmes Monsieur le Cardinal du Perron en plaine assemblee generale des Iacobins, soustint au Nonce du Pape, que telle estoit la doctrine de la France; & autre celle de delà les monts: Que le Pape ne peut commander aucune chose en France, soit en general ou particulier, de ce qui concerne les choses temporelles: Qu'encores que le Pape soit recogneu pour souuerain es choses spirituelles; toutesfois en France la puissance absoluë & infinie n'a point de lieu; mais est retenuë & bornee par les canons & regles des anciens Conciles: Que les facultez des Legats du Pape n'ont aucun effect en ce Royaume, si elles ne sont verifiees au Parlement: Que le Pape ne peut exposer en proye le Royaume de France, & ce qui en depend, ni en priuer le Roy, ou en disposer en quelque façon que ce soit, & quelques monitions, excommunications, ou interdictions qu'il puisse faire, les suiets ne doiuent laisser de rendre au Roy l'obeissance deuë pour le temporel, & n'en peuvent estre dispensez ny absous par le Pape: Que les dispenses ne sont receuës qu'en cas

D

raisonnables : & autres infinis articles qui seroient longs à reciter, qui s'exécutent tous les jours en France ; & par conséquent se peuvent tres-nettemēt & facilement prouver. Ceste longue & exacte obseruation de ces droits n'a point empesché que nos Rois n'ayent eu des Papes mesmes, & des Italiens, ces beaux noms de Saincts, de Tres-Chrestiens, de Rois des Rois de la terre, de liberateurs & defenseurs de l'Eglise, & de la Religion Chrestienne, de chefs de tous les Chrestiens, de grands, de sages, & eu l'hōneur presque eux seuls d'auoir augmenté de beaucoup les biens temporels de l'Eglise. Ceste liberté de l'Eglise Gallicane enoncee generally : (car de l'exprimer article par article, ils ne l'endureront jamais,) peut estre fort preiudiciable à la Frâce; y ayant des Articles expres & precis dans le Concile contraires à nos droiçts : Articles jugez bons par ceux qui ont escrit en faueur du Concile : contre lesquels nous aurons des libertez non expresses ni escrites : & dont nous n'auons qu'un ancien vsage : & delà tout homme de bon jugement peut considerer s'il y aura de l'apparence de nous pouuoir maintenir en ces franchises contre le Pape, qui aura des bornes toutes fresches marquées dans le Concile ; auquel nous ne pourrons opposer que des memoires

res esparts çà & là, dans les Registres des Parlemens, & non ramassez en vn corps, comme est le Concile; & en vsage qui se peut perdre, ou à tout le moins de beaucoup alterer par la mort des anciens Officiers: cecy en vn temps ou toutes choses sont tenuës pour problematiques, est de tres-dangereuse consequence. La permission que le Concile donne au Pape de prohiber la lecture de tel liure que bon luy semble, fait craindre que ces droicts seroient bien tost ancantis, & la crainte n'est pas sans beaucoup d'apparence; veu que l'on voit en l'indice des liures prohibez par le Concile, la deffense du liure intitulé, le Songe du Verger, qui est vne graue & serieuse dispute entre vn Clerc & vn Cheualier, faicte par l'expres commandement de ce sage Roy Charles V. pour la preuue de ses droicts, & manutention de son auctorité: comme aussi les œuures de Clamengis grād Theologien François, pour auoir franchement parlé des abus de la Cour Romaine. Et est tres-certain que tous les liures qui traitent ces matieres sont abominez delà les monts, & estroitement defendus, & le seront en France, si la publication a lieu: & par ainsi dans peu d'annees nous serons sans preuue. Et nous auons veu à nostre honté, en nos iours cōment ils y procedent, cen-

surants les Arrests de cōdamnation contre les parricides, sous pretexte de quelques mots qu'ils ne peuuent souffrir. De cecy peut naistre vn autre inconuenient qui est grand, en ce que les Ecclesiastiques, soit ou qu'ils ignoreront ces droicts, ou qu'ils les voudront affoiblir, entreprēdront à dessein l'exécution de quelques articles du Concile importants, cōtraindront les Officiers du Roy à s'opposer, qui remontreront nostre vsage ancien, ils les presserōt d'en faire voir l'origine, en blasmeront la pratique, & sur cela mille cōtestations, qui ne seruirōt qu'à separer & desvnr les suiećts du Roy, & troubler la tranquillité publique. Pour finir ce point, le Roy Charles IX. par ses lettres du 9. Nouembre cio. 15 LXIII. escrite à Monsieur le Card. de Lorraine, qui estoit lors au Concile, approuuant la retraicte de ses Ambassadeurs, monstra que ceste exception ne luy estoit nullement agreable. Car si l'on pensoit, (dit-il) *me contenter de dire que l'on mettra, sauf & reserué mes droicts, vsages, auctoritex, & priuileges, & que sous ceste couleur l'on voulut pretendre que ie feusse tenu d'en faire apparoir; c'est chose à quoy ie m'opposeray tousiours pour ne le vouloir consentir ni souffrir aucunement.* Tellement que l'expression de ces libertez ne pourront plaire au Pape, & l'enōciation generale est preiudiciable à l'authorité du Roy, pour les

grands inconueniens qui en peuuent arriuer. Au reste il ne se parla iamais de reception entiere d'un Concile en ce Royaume; ce sont remedes generaux & particuliers pour toute la Chrestienté, quelques Decrets se trouuent vtiles pour vn pays, les autres contraires à sa seureté. Chacun prend de ces particuliers ce qui luy est utile & necessaire pour sa correction & conseruation. Nos Rois de la seconde lignee l'ont ainsi pratiqué: Charlemagne, Louis le Debonnaire, & Charles le Chauue, ont fait leurs capitulaires, où ils ont employé les Canons des Conciles pour l'usage de leurs suiets. Louis le Debonnaire publia de son temps vne reformation entiere de son Clergé, tiree tât des anciens Conciles, que des plus remarquables lieux des SS. Peres. Charles le Chauue publia mesme dans Rome quelques capitulaires pour le gouvernement de son Estat. Cela a esté aussi obserué en ceste troisieme lignee, qui regne à present heureusement. Sainct Louis fit il pas sa pragmatique pour reestabli la discipline Ecclesiastique en son Royaume, & s'opposa aux entreprises & exactions de la Cour de Rome, qui se glissoient pied à pied dans son Estat, luy qui a esté pour sa sainte vie mis au nombre des bien-heureux, & dont l'Eglise

tous les ans celebre la memoire. La pragmatique Sanction de Charles VII. sous l'observation de laquelle, bien que les Papes en ayent chaudement poursuiuy l'abolition, les suiets du Roy n'ont pas laissé de se regler vn fort long temps, n'est elle pas tirce des Decrets du Concile de Basle, desquels l'Eglise Gallicane, en presence de son Roy, & des grands du royaume, a retransché, diminué & adiousté comme bon luy a semblé, non, (porte la Pragmatique) pour reuoquer en doute la puissance du Concile: mais pour ce que le temps, les mœurs du pays, & les personages le requierent ainsi. Et ne faut point dire qu'elle fut abolie en France à la poursuite très-violente du Pape Pie II. bien que son Epitaphe en soit chargé, comme d'une memorable victoire; car long temps depuis Louis XII. Pere du peuple, la fist obseruer inuiolablement, par ordonnance expresse, iusques à la fin de sa vie. Et en ces derniers temps le roy Henry III. ne fit il pas extraire du Concile de Trente les articles qu'il trouua vtils & necessaires pour le repos de son Estat, & les fit inserer par l'aduis des Estats generaux, dans l'Ordonnance qu'il fit à Blois en l'an CIO. IO LXXVI. Par ces exemples l'on voit que quand nos rois ont tiré des Conciles, des articles seruans à la police, & au reglement de leur Estat, ils les ont cōuertis à leur

usage, les ont modifiez, restreins & estendus comme bon leur a semblé, & les ont publiez sous leurs noms, sans en consulter personne: & ce par forme de Pragmatiques, d'Edicts & Ordonnances, & non point comme Conciles: car il n'y a qu'eux seuls qui peuuent faire ordonnance en leur Royaume. Ils ne seroient pas Souuerains autrement. L'on sçait que les compagnies reglees, & qui de tout temps ont tenu les maximes Françoises, sans vaciller en leur croyance, selon les saisons, si opposeront tousiours: les Parlemens ont autant de courage qu'ils eurent iamais, ils n'ont qu'à imiter leurs Predecesseurs: la Sorbonne non preuenüe ne changera ses maximes anciennes, se resouuenant du rang qu'elle a tenu autrefois lors qu'elle estoit cōstante & vnice: & les Chapitres n'auront pas moindre affection de maintenir leurs immunitiez, & faut qu'ils s'assurent, que si l'on trouue à present quelques mots palliatifs pour les cōtenter, qu'il sera tres-facile de les reuoquer, lors qu'il n'y aura qu'eux seuls qui y auront interets. Mais il y a vn mal qui gaigne peu à peu comme vne gangrene dans le corps de cet Estat, que l'on croit plustost aux calōnies & aux artifices, qu'à la verité, & aux choses solides. Car pour diminuer en quelque chose l'autorité & le credit de ceux qui sont

exercez en ces droits, ou qui en ont laissé memoire à la posterité, l'on s'attache à deschirer leur memoire, l'on les tire en défiâce; bref on dit tout haut, ce sont heretiques. Ainsil leur faut il faire pour destruire la verité, & iuger de l'interieur, qui est reserué à Dieu seul. Et pensent ces gens, qui ont tousiours pris plus de peine à bien dire, qu'à bien faire, auoir dit vn beau mot, duquel se pare nostre cauillateur, quand ils disent pour attirer le mōde à leur mauuais dessein, *Que comme on a cuidé ruiner l'Estat soubs pretexte de la religion, on veut maintenant ruiner la religion soubs ombre de l'Estat.* Je leur dis avec les Prelats d'Allemagne, cōme rapporte Radeuicus historien, qui viuoit il y a quatre cens ans, & avec plus de verité; *In capite orbis Deus per Imperium exaltauit Ecclesiam, in capite orbis Ecclesia (i'aimerois mieux dire Curia Romana) non per Deum, vt credimus, nunc demolitur Imperium.* C'est où ils trauaillent à present, par toutes sortes de mauuais moiens, sans mettre en consideration, ni la diminution de l'autorité Royale, qui tire apres soy le mespris, puis la subuersion de l'Estat, & en fin l'establissement de l'Estranger.

